

■ CONVIVENZA

Nadal è in stadi d'anim

DA FADRINA HOFMANN*

Icumenza adina enturn l'avust. «Quants dis vai anc fin Nadal?», dumonda lura mes figl la saira avant che sa durmentar. E perquai ch'el è talmain perseverant e repeta sia dumonda adina ed adina puspè, capitulesch jau il pli tard il settember e fatsch in countdown per el. Sin l'agenda notesch jau ils dis che mancan anc fin Nadal. L'agenda vegn lura consultada regularmain. Ah, tge muments da plaschair, cura ch'i daventa or da mais be anc emnas ed or da dis be anc uras!

Apaina ch'il temp d'advent è arrivà daventa mintga di ina pitschna festa. Igl è l'unic temp da l'onn ch'ils uffants levan voluntarmain cura ch'igl è anc stgirdadora. Era sch'els han già indesch e nov onns sa legran els mintga damaun da vesair tge surpraisa ch'è puspè en il satget dal chalender d'advent. D'ensolver glischan en cuschina las chandailas sin il cranzin d'advent e la decoraziun da Nadal en chasa procura per in'atmosfera tut speziala. La saira sa radunan lura mes dus uffants en in letg per tadlar l'istorgia d'advent – mintg'onn raquint jau la medema istorgia. Per quell'istorgia cun 24 chapitels èn mes uffants atgnamain gia memia vegls, mo «Schnüpperle» ha tradiziun tar nus, el tutga quasi tar nossa famiglia.



Las aventuras ch'il mat lumpaz Schnüpperle passenta durant il temp d'advent raquintava gia nossa mamma a nus trais fragliuns. Ed era per nus era il temp da Nadal il highlight da l'onn. La savur da noss chalender d'advent na vegn jau mai ad emblidar. Igl era in ballun ad aria chauda violet. Vi d'ingrond satg da jura pendevan ils satgins. Las surpraisas eran be pitschnas: ina carotta da marzipan, ina tschigulattina, in anghelin.

Ma il plaschair anticipà, quel era uschè grond sco nagut auter. Cun excepziun da la festa da Nadal forsa. Quella è tar nus adina uschè festiva ch'jau aveva scrit ina giada en mes diari: «Igl è uschè bel da star davant quest pignol da Nadal che tanscha fin al plafond, d'admirar las flommas da las chandailas che sa spievlan en las cullas cotschnas. Igl è uschè privà da savurar l'odur da la dascha en nossa stiva da schember e d'udir las chanzuns da Nadal che nossa

gronda famiglia chanta en pliras vuschs. I fa prest mal il cor dal bel ch'igl è da Nadal tar nus.»

Legend questas frusas 25 onns pli tard tunan ellas bain in pau pateticas, però ellas mussan era quant impurtants ch'èn per in uffant ils rituals, las tradiziuns e las festas. Il temp d'advent e da Nadal crescha regurdientschas ch'ins n'emblida mai pli. Perquai vom jau d'accord cun il politicher american Calvin Coolidge che ha ditg ina giada: «Nadal n'è betg in temp u ina stagion, Nadal è in stadi d'anim.»

Da stgaffir tar mes agens uffants quest stadi d'anim, quest sentiment da Nadal incumparabel, è insatge che ma stat fitg a cor. Da vesair lur agitaziun la saira avant il 1. da december, da badar lur daletg cura che nus faschain ensemen grassins, da sentir l'admiraziun cura ch'els stattan davant il pignol da Nadal – quai ma dat satisfacziun. E quai ma lascha mintg'onn era returnar in zic en mi'atgna uffanza. «Donn ch'i dat be ina giada l'onn Nadal», ha ditg mia figlia ina giada cura ch'ella era anc pli pitschna. Na, chara, per fortuna datti Nadal be ina giada l'onn. Lura pon ins sa legrar indesch lungs mais sin la proxima festa.

*** Fadrina Hofmann è redactura tar la «Südostschweiz» e viva cun sia famiglia a Scuol.**